



САВЈЕТ НАЦИОНАЛНИХ МАЊИНА

VIJEĆE NACIONALNIH MANJINA

Broj: 05/7-39-1-178-27,4/25

Sarajevo, 30. 1. 2025.

БОСНА И ХЕРЦЕГОВИНА
ПАРЛАМЕНТАРНА СКУПШТИНА БОСНЕ И ХЕРЦЕГОВИНЕ
SARAJEVO

PRIMLJENO:	03-02-2025		
Organizaciona jedinica	Klasifikaciona oznaka	Redni broj	Broj priloga
01,02	39-1-	331/25	

PARLAMENTARNA SKUPŠTINA BOSNE I HERCEGOVINE


- PREDSTAVNIČKI DOM
- DOM NARODA

**PREDMET: Izvještaj o radu Vijeća nacionalnih manjina
Bosne i Hercegovine za 2024. godinu**

Poštovani,

U prilogu dostavljamo Izvještaj o radu Vijeća nacionalnih manjina Bosne i Hercegovine za 2024. godinu, usvojen na 27. sjednici Vijeća nacionalnih manjina Bosne i Hercegovine održanoj 30. 1. 2025.

S poštovanjem,



Dostavljeno:

- naslovu
- a/a

Prilog:

- tabelarni prikaz prisustva sjednicama

Broj: 05/7-39-1-178-27,4/25

Sarajevo, 30. 1. 2025.

**IZVJEŠTAJ O RADU VIJEĆA NACIONALNIH MANJINA
BOSNE I HERCEGOVINE ZA 2024. GODINU**

Sarajevo, januar 2025. godine

IZVJEŠTAJ O RADU
VIJEĆA NACIONALNIH MANJINA BiH
ZA 2024. GODINU

I. UVODNE NAPOMENE

Vijeće nacionalnih manjina Bosne i Hercegovine je stalno savjetodavno tijelo Parlamentarne skupštine Bosne i Hercegovine. Na osnovu člana 5. Odluke o Vijeću nacionalnih manjina Bosne i Hercegovine („Službeni glasnik BiH“, broj 10/21) (u daljnjem tekstu: Odluka), također je utvrđeno da Vijeće daje mišljenja, savjete i prijedloge Parlamentarnoj skupštini BiH o pitanjima koja se tiču prava, položaja i interesa nacionalnih manjina u Bosni i Hercegovini.

Na osnovu člana 3. stav (5) Odluke, Parlamentarna skupština BiH je na 30. sjednici Predstavničkog doma, održanoj 27. 6. 2022, i na 24. sjednici Doma naroda, održanoj 27. 7. 2022, donijela Odluku o imenovanju Vijeća nacionalnih manjina BiH, u sljedećem sastavu:

Zamire Sokoli (Albanka),
Davor Ebner (Austrijanac),
Skender Mustagrudić (Crnogorac),
Željko Vaško (Čeh),
Franjo Rover (Italijan),
Ernest Grin (Jevrej),
Saša Mićin (Mađar),
Todorka Jovanović (Makedonka),
Velibor Kuvač (Nijemac),
Dejan Piotrovski (Poljak),
Mujo Fafulić (Rom),
Violeta Džolan (Rumunka),
Igor Kotjelnikov (Rus),
Mihal Hemun (Rusin),
Danijel Štefek (Slovak),
Dragica Tešić (Slovenka),
Hakan Varan (Turčin),
Miroslav Bobrek (Ukrajnac).

Za predsjedavajućeg je izabran Mujo Fafulić, za prvu zamjenicu Todorca Jovanović, a za drugu zamjenicu Violeta Džolan.

Kolegij Sekretarijata Parlamentarne skupštine BiH je aktom broj: 03-50-13-25-68,1/23 od 4. 7. 2023. obavijestio Sektor za druga parlamentarna tijela o preuzimanju i obavljanju stručne i administrativno-tehničke podrške Vijeću nacionalnih manjina BiH umjesto zaposlenih u Uredu sekretara Zajedničke komisije za ljudska prava PSBiH.

U skladu s navedenim obavještenjem, Sektor je od 5. 7. 2023. preuzeo obavljanje navedenih poslova za potrebe Vijeća nacionalnih manjina BiH.

Izveštaj o radu Vijeća nacionalnih manjina Bosne i Hercegovine sadrži i zbirni zaključak za izvještajni period od 1. 1. do 31. 12. 2024. godine.

II. IZVJEŠTAJ O RADU ZA PERIOD 1. 1 – 31. 12. 2024. GODINE

1. Sjednice i sastanci Vijeća nacionalnih manjina BiH

U periodu 1. 1. 2024 – 31. 12. 2024. Vijeće nacionalnih manjina BiH održalo je **12 redovnih sjednica i jednu tematsku sjednicu**, kako slijedi:

REDNI BROJ SJEDNICE I DATUM ODRŽAVANJA SJEDNICE	BROJ TAČAKA DNEVNOG REDA
15. sjednica, 25. 1. 2024.	4
16. sjednica, 29. 2. 2024.	3
17. sjednica, 22. 3. 2024, održana u Prnjavoru	4
18. sjednica, 8. 4. 2024, održana u Kaknju	4
19. sjednica, 21. 5. 2024.	3
20. sjednica, 25. 6. 2024.	4
21. sjednica, 22. 7. 2024.	5
22. sjednica, 27. 8. 2024.	5
23. sjednica, 26. 9. 2024.	6
24. sjednica, 29. 10. 2024, održana u Neumu	5
25. sjednica, 18. 11. 2024.	6
26. sjednica, 10. 12. 2024, održana u Banjoj Luci	4

U izvještajnom periodu od 1. 1. 2024. do 31. 12. 2024. Vijeće nacionalnih manjina BiH održalo je 12 redovnih sjednica i jednu tematsku sjednicu na kojima je razmatralo 55 tačaka dnevnog reda, ne računajući teme i inicijative iznesene prilikom rasprave o tekućim pitanjima.

U skladu sa zaključkom Vijeća nacionalnih manjina BiH, na sve sjednice uredno su pozivani predstavnici Ministarstva za ljudska prava i izbjeglice BiH.

U izvještajnom periodu Vijeće nacionalnih manjina BiH razmatralo je i raspravljalo o:

- Izvještaju o radu Vijeća nacionalnih manjina BiH za 2023. godinu;
- Nacrtu plana rada Vijeća nacionalnih manjina za 2024. godinu;
- Nacrtu plana rada Vijeća nacionalnih manjina za 2025. godinu;
- organizaciji i održavanju 1. konferencije nacionalnih manjina BiH;
- prijedlozima za izmjene Izbornog zakona BiH;
- analizi problema i donošenju preporuka za adekvatno ostvarivanje prava nacionalnih manjina u Zakonu o zaštiti prava pripadnika nacionalnih manjina BiH;
- analizi problema i donošenju preporuka za adekvatno ostvarivanje prava nacionalnih manjina u Izbornom zakonu BiH;
- Programu za promociju prava manjina u BiH s kalendarom zajedničkih aktivnosti s vladama i institucijama zainteresiranih država, kao i s međunarodnim institucijama;
- Informaciji o medijskim istupima članova Vijeća, a u vezi s radom, djelovanjem, ulogom, položajem, problemima u funkcioniranju, kao i aktivnostima koje provodi Vijeće;
- pripremama inicijativa – inicijative su uredno pripremljene i upućene na relevantne adrese;
- usmenoj informaciji s 4. međuagencijskog okruglog stola „Konsultativni mehanizmi za integraciju različitih društava“ održanog u Hagu, 3. i 4. 7. 2024. - na okruglom stolu učestvovala Violeta Džolan, druga zamjenica predsjedavajućeg Vijeća;
- usmenoj informaciji o Studijskoj posjeti i sastanku s predstavnicima Ministarstva za ljudska i mnjinska prava i društveni dijalog Republike Srbije, 10 - 12. 6. 2024, Beograd i Subotica, u organizaciji Misije OSCE-a u BiH - učestvovali članovi Vijeća Davor Ebner i Franjo Rover;
- Prijedlogu rasporeda troškova Vijeća nacionalnih manjina BiH za 2025. godinu;
- Informaciji o izvršenju planiranih sredstava Vijeća nacionalnih manjina BiH za period od 1. 1. do 9. 8. 2024, akt broj: 05/7-39-1-173-20,8/24;

- izradi 4. mišljenja izvještaja Bosne i Hercegovine o implementaciji Evropske povelje o regionalnim ili manjinskim jezicima i dostavilo odgovore na upitnik Ministarstva za ljudska prava i izbjeglice BiH;
- analizi realizacije Plana rada Vijeća nacionalnih manjina BiH za 2024. godinu;
- usmenoj informaciji sa sastanka predsjedavajućeg Vijeća s političkim analitičarom izborne posmatračke misije OSCE-ovog Ureda za demokratske institucije i ljudska prava (ODIHR) Nicholasom Jahrom, sastanak održan 1. 10. 2024. u zgradi Parlamentarne skupštine BiH;
- Izmjenama Odluke o utvrđivanju troškova Vijeća nacionalnih manjina BiH;
- Izmjenama i dopunama Poslovnika Vijeća nacionalnih manjina BiH;
- dopisima, predstavkama i drugim aktima koji su upućeni Vijeću nacionalnih manjina BiH.

U periodu 1. 1. 2024 – 31. 12. 2024. Vijeće nacionalnih manjina BiH, između ostalih, realiziralo je i provelo sljedeće aktivnosti:

- usvojilo Izvještaj o radu Vijeća nacionalnih manjina BiH za 2023. godinu i uputilo ga Parlamentarnoj skupštini BiH na razmatranje i usvajanje. Izvještaj o radu Vijeća nacionalnih manjina BiH za 2023. godinu usvojen je na 20. sjednici Predstavničkog doma PSBiH, održanoj 16. 7. 2024, i na 15. sjednici Doma naroda PSBiH, održanoj 12. 11. 2024;
- usvojilo Plan rada Vijeća nacionalnih manjina za 2024. godinu;
- usvojilo Plan rada Vijeća nacionalnih manjina za 2025. godinu;
- usvojilo Raspored troškova Vijeća nacionalnih manjina BiH za 2025. godinu;
- održalo 1. konferenciju nacionalnih manjina BiH 21. 5. 2024. u zgradi Parlamentarne skupštine BiH u Sarajevu;
- održalo 1. tematsku sjednicu 30. 10. 2024. u Neumu;
- pripremilo i usvojilo sljedeće inicijative: Inicijativa za sprečavanje zloupotreba statusa nacionalnih manjina i unapređenje izbornog procesa u BiH i Inicijativa za promjenu jednog od jezika i pisama na identifikacionim dokumentima državljana BiH.

Prva konferencija nacionalnih manjina Bosne i Hercegovine

Vijeće nacionalnih manjina BiH, u saradnji s Misijom OSCE-a u BiH i Ministarstvom za ljudska prava i izbjeglice BiH, 21. 5. 2024. u zgradi Parlamentarne skupštine BiH organiziralo je 1. konferenciju nacionalnih manjina BiH s ciljem unapređenja saradnje Vijeća nacionalnih manjina BiH s udruženjima nacionalnih manjina koja djeluju u BiH, kao i podrške nadležnih institucija kulturnoj saradnji nacionalnih manjina u BiH.

Prva konferencija, održana kroz dva tematska panela, bila je prilika da brojni predstavnici udruženja nacionalnih manjina u BiH, predstavnici institucija na svim nivoima vlasti u BiH te predstavnici ambasada priznatih nacionalnih manjina u BiH i međunarodne zajednice razmijene mišljenja, stavove i iskustva o pravima, položaju i interesima nacionalnih manjina u BiH, kao i funkcioniranju i radu udruženja nacionalnih manjina u BiH.

Tokom konferencije učesnici su iznijeli i određene prijedloge rješenja i modaliteta kojima bi se unaprijedio rad i funkcioniranje udruženja i vijeća nacionalnih manjina u BiH. Akcentirajući važnost međusobne saradnje Vijeća i udruženja nacionalnih manjina, kao i saradnje s nadležnim institucijama, lokalnim vlastima i međunarodnim organizacijama, prisutni su konstatali da djelovanje Vijeća, kao savjetodavnih tijela, mora jasno artikulirati potrebe i zahtjeve udruženja nacionalnih manjina, te naglasili da saradnja Vijeća sa institucijama mora ići u pravcu aktivnijeg učešća u procesu izrade i donošenja zakonskih i drugih akata, prvenstveno u onom dijelu koji se odnosi na politička, kulturna i sva druga prava nacionalnih manjina. Učesnici su se saglasili i o tome da je važno raditi i na otklanjanju određenih administrativnih i proceduralnih prepreka kada je riječ o pristupu grantovima kojima se finansiraju projekti kojima se rješavaju problemi s kojima se nacionalne manjine suočavaju u svojim lokalnim zajednicama, uključujući prisustvo stereotipa i diskriminacije, trendove asimilacije i zloupotrebe nacionalnog izjašnjavanja, problem obrazovanja, očuvanja jezika i kulture, te zastupljenosti u medijima i većoj vidljivosti u javnom prostoru.

Na konferenciji su usvojeni i zaključci koji su prosljeđeni svim učesnicima konferencije. Važno je navesti da je 1. konferencija nacionalnih manjina u BiH imala značajan odziv učesnika te je medijski veoma dobro praćena. Sve aktivnosti u vezi s organizacijom i samim održavanjem ove konferencije, a koja će se, prema Planu rada Vijeća nacionalnih manjina BiH, održavati svake godine, uredno su objavljene na veb-stranici Parlamentarne skupštine BiH.

Inicijative Vijeća nacionalnih manjina BiH

U izvještajnom periodu Vijeće nacionalnih manjina BiH pripremlilo je i usvojilo dvije važne inicijative.

- Inicijativa za sprečavanje zloupotreba statusa nacionalnih manjina i unapređenje izbornog procesa u BiH

Navedenu inicijativu usvojili su i potpisali svi članovi Vijeća nacionalnih manjina BiH, podržali i potpisali predstavnici udruženja nacionalnih manjina u BiH te je Inicijativa upućena na sljedeće adrese: Centralna izborna komisija BiH, Misija OSCE-a u BiH, Ured visokog predstavnika (OHR), Vijeće za provođenje mira (PIC), Institucija ombudsmena za ljudska

prava BiH, Predsjedništvo BiH, Parlamentarna skupština BiH, predsjednik Republike Srpske, Narodna skupština Republike Srpske, Parlament Federacije BiH, predsjednik Federacije BiH, Skupština Brčko Distrikta BiH, gradonačelnik Brčko Distrikta BiH.

Ciljevi inicijative:

- transparentnost i integritet izbornog procesa – osiguravanje transparentnih i vjerodostojnih izbora u kojima će svi građani, uključujući nacionalne manjine, učestvovati u političkom životu;
- jačanje političke participacije nacionalnih manjina – povećanje političke participacije nacionalnih manjina u BiH, osiguravajući da njihovi glasovi budu adekvatno zastupljeni u političkim institucijama.

Vijeće nacionalnih manjina je ovu inicijativu definiralo kao inicijativu od vitalnog značaja za unapređenje demokratskih standarda u BiH te pozvalo sve relevantne aktere da podrže napore Vijeća i udruženja u borbi protiv zloupotreba prilikom izjašnjavanja o nacionalnoj pripadnosti. U Inicijativi je, između ostalog, navedeno kako zahtjevi nisu ostvarivi u kratkom roku, ali da je Vijeće spremno započeti dijalog s predstavnicima vlasti na svim nivoima kako bi se pitanje zloupotreba riješilo u zajedničkom interesu. Dugoročno rješenje problema diskriminacije pripadnika nacionalnih manjina u izbornom procesu na koji je skrenuta pažnja u Inicijativi podrazumijeva izmjene Izbornog zakona BiH i odgovarajućih podzakonskih akata. Buduće izmjene i dopune Izbornog zakona BiH koje su prevashodno inicirane da se zaštite prava većinskih naroda treba iskoristiti da se njima na adekvatan način preciznije reguliraju i zaštite prava nacionalnih manjina u izbornom procesu.

Prijedlozi za rješavanje:

- definiranje objektivnih kriterija,
- jačanje procedura verifikacije,
- edukacija birača,
- zaštita prava nacionalnih manjina.

Inicijativa sadrži i akcioni plan koji predviđa:

- lobiranje i zagovaranje – aktivna saradnja s relevantnim političkim strankama, međunarodnim organizacijama i lokalnim vlastima kako bi se osigurala podrška za provođenje predloženih mjera;
- kampanju informiranja – provođenje javnih kampanja, radionica i seminara kako bi građane informirali o pravima nacionalnih manjina i važnosti fer izbornog procesa.

Imajući u vidu činjenicu o značaju navedene inicijative, članovi Vijeća su aktivnim učešćem u medijskom prostoru informirali relevantne domaće i međunarodne institucije i cjelokupnu

javnost o značaju, ciljevima, potrebama djelovanja, modalitetima i načinima za rješavanje uočenih i prisutnih problema u izbornom zakonodavstvu BiH, posebno kada je riječ o izbornom procesu i participaciji manjina u institucijama vlasti.

- Inicijativa za promjenu jednog od jezika i pisama na identifikacionim dokumentima državljana BiH

Vijeće nacionalnih manjina BiH je navedenu inicijativu usvojilo i uputilo Agenciji za identifikacione dokumente, evidenciju i razmjenu podataka. Vijeće smatra da bi ova inicijativa značajno doprinijela unapređenju prava i dostojanstva pripadnika nacionalnih manjina u BiH. Inicijativom je predloženo da se u obrascu za popunjavanje zahtjeva za izdavanje dokumenata (obrazac za izdavanje/zamjenu lične karte), pored jezika koji su u službenoj upotrebi, pripadniku nacionalne manjine, kao i da se u indentifikacionom dokumentu (ličnoj karti), umjesto engleskog jezika, uvede i izbor jezika i pisma nacionalne manjine. U Inicijativi je navedeno obrazloženje za podnošenje inicijative, predložena rješenja te zaključeno kako usvajanje Inicijative ne bi samo poboljšalo pristup dokumentima za pripadnike nacionalnih manjina već bi se ojačala društvena kohezija i doprinijelo pozitivnoj percepciji BiH kao multikulturalne zajednice. Sve ovo bi dodatno ojačalo posvećenost BiH ljudskim pravima i različitostima i poslana snažna poruka o otvorenosti i inkluzivnosti bh. društva.

1. tematska sjednica Vijeća nacionalnih manjina BiH

Vijeće nacionalnih manjina BiH je u ovom izvještajnom periodu održalo i 1. tematsku sjednicu – Razmatranje Izmjene Odluke o utvrđivanju troškova rada Vijeća nacionalnih manjina BiH. Rukovodilac Sektora za finansije Sekretarijata PSBiH upoznao je članove Vijeća s odredbama Zakona o dopunama Zakona o plaćama i naknadama u institucijama BiH i Odlukom Vijeća ministara BiH o visini, načinu postupka ostvarivanja prava na naknadu za prijevoz na posao i prijevoz s posla u institucijama BiH. Članovi Vijeća nacionalnih manjina usvojili su Zaključak (akt broj: 05/7-39-1-1902-1,2/24) koji sadrži iskazane potrebe za ostvarivanje prava, a koji se trebaju mijenjati u dosadašnjoj Odluci o utvrđivanju troškova rada Vijeća nacionalnih manjina BiH. Usvojeni zaključak dostavljen je Kolegiju Sekretarijata Parlamentarne skupštine BiH (akt broj: 05/7-39-1-173-24,10/24). U okviru ove tematske sjednice Vijeće je raspravljalo i o statusu ovog savjetodavnog parlamentarnog tijela te je Kolegiju Sekretarijata PSBiH upućen dopis u vezi s upitom o statusu Vijeća i pružanju stručne i administrativno-tehničke podrške radu Vijeća (akt broj: 05/7-39-1-173-24,12/24).

Razmatranje Izmjene Odluke o utvrđivanju troškova rada Vijeća nacionalnih manjina BiH bila je i tačka dnevnog reda na 25. sjednici, održanoj 18. 11. 2024, na koju je pozvan i prisustvovao

joj je sekretar Zajedničke komisije za administrativne poslove PSBiH. Sekretar je detaljno informirao članove Vijeća o iskazanim zahtjevima iz usvojenog zaključka te dao iscrpne odgovore koji se temelje na važećim propisima. Također, predložio je mogući način i modalitet djelovanja Vijeća s ciljem poboljšanja statusa i boljeg ostvarivanja svojih prava, a u skladu sa zakonskim procedurama. Članovi Vijeća usvojili su zaključak da se uputi dopis i zatraži sastanak s ministrom za ljudska prava i izbjeglice BiH kako bi se pokrenula izmjena zakonodavstva koja bi doprinijela unapređenju statusa, položaja i uloge Vijeća nacionalnih manjina BiH, a izmjenom važećih propisa koje je donijelo Vijeće ministara BiH poboljšala prava, posebno ona propisana Zakonom o plaćama i naknadama u institucijama BiH, na osnovu zaključaka koje je Vijeće usvojilo na 1. tematskoj sjednici (akt broj: 05/7-39-1-173-26,4/24).

Poslovnik Vijeća nacionalnih manjina BiH

Vijeće nacionalnih manjina je u dijelu izvještajnog perioda, razgovaralo o potrebi izmjene akata kojima je Vijeće osnovano i uredilo svoj rad, te je i Poslovnik Vijeća nacionalnih manjina BiH bio predmet analize na 25. i 26. sjednici Vijeća. Članovi Vijeća dostavili su svoje prijedloge te je na 26. sjednici, održanoj 10. 12. 2024. u Banjoj Luci, zaključeno da će Vijeće, nakon što usaglasi izmjene i dopune novog poslovnika, uputiti poslovnik Zakonodavno-pravnom sektoru Sekretarijata Parlamentarne skupštine BiH kako bi se, prije usvajanja, utvrdila usklađenost s poslovnica oba doma Parlamentarne skupštine BiH. Poslovnik je veoma važan dokument te će ova aktivnost biti nastavljena na sjednicama Vijeća i u 2025. godini.

U dijelu izvještajnog perioda Vijeće nacionalnih manjina je kao rezultat usvojenih zaključaka, održanih sastanaka, iskazanih potreba za rad i funkcioniranje te provođenja planiranih aktivnosti uputilo i odgovarajuće dopise:

- dopisi za sastanak predstavnika Vijeća nacionalnih manjina s ministricom civilnih poslova BiH u vezi s grant sredstvima koja dodjeljuje Ministarstvo civilnih poslova BiH s posebnom molbom za izdvajanje dijela sredstava (određenog procenta) za potrebe udruženja nacionalnih manjina iz već osiguranih sredstava za grantove koje dodjeljuje Ministarstvo, odnosno molbom za uspostavljanje posebnog granta s određenim iznosom sredstava za udruženja nacionalnih manjina u BiH (dopisi Vijeća, broj: 05/7-39-1-173-22,5/24 od 28. 8. 2024. i 05/7-39-1-173-24,8/24 od 1. 11. 2024);
- dopisi za sastanak predstavnika Vijeća nacionalnih manjina sa Zajedničkom komisijom za ljudska prava Parlamentarne skupštine BiH o temi: „Inicijativa za sprečavanje zloupotreba statusa nacionalnih manjina i unapređenje izbornog procesa u BiH“, kao i ostalim temama u

vezi s problemima nacionalnih manjina u BiH (dopisi Vijeća, broj: 05/7-39-1-158-15,6/24 od 30. 1. 2024, 05/7-39-1-173-22,6/24 od 28. 8. 2024. i 05/7-39-1-173-27,9/24 od 1. 11. 2024);

- dopis ministru za ljudska prava i izbjeglice BiH za održavanje sastanka s članovima Vijeća nacionalnih manjina BiH na osnovu zaključaka koje je Vijeće usvojilo na 1. tematskoj sjednici (akt broj: 05/7-39-1-173-26,4/24);

- dopisi sekretaru Zajedničke službe PSBiH i nadležnim službama u vezi s pripremom, organizacijom i održavanjem 1. konferencije nacionalnih manjina BiH;

- dopisi/pozivi za učešće u radu 1. konferencije nacionalnih manjina BiH – udruženja nacionalnih manjina u BiH, predstavnici institucija na svim nivoima vlasti u BiH koja u svojoj nadležnosti imaju oblast zaštite prava nacionalnih manjina, predstavnici međunarodnih organizacija u BiH, ambasade država priznatih nacionalnih manjina u BiH, predstavnici medija, kao i drugi ugledni gosti;

- dopis – zaključci usvojeni na prvoj konferenciji nacionalnih manjina BiH, upućeni svim učesnicima konferencije (dopis Vijeća, broj: 05/7-39-1-173-19,13/24);

- dopis – Inicijativa za sprečavanje zloupotreba statusa nacionalnih manjina i unapređenje izbornog procesa u BiH – upućena svim relevantnim domaćim i međunarodnim institucijama u BiH (akt broj: 05/7-39-1-173-21,4/24);

- dopis - Inicijativa za promjenu jednog od jezika i pisama na identifikacionim dokumentima državljana BiH – upućena Agenciji za identifikacione dokumente, evidenciju i razmjenu podataka BiH (akt broj: 05/7-39-1-173-24,7/24);

- dopisi – zaključak usvojen na 1. tematskoj sjednici Vijeća – upućen Kolegiju Sekretarijata Parlamentarne skupštine BiH (dopisi Vijeća, broj: 05/7-39-1-173-24,10/24 i 05/7-39-1-173-24,12/24);

- dopisi upućeni predstavnicima Ministarstva za ljudska prava i izbjeglice BiH u vezi s prisustvom sjednicama Vijeća i aktivnostima koje je Vijeće organiziralo;

- dopisi upućeni sekretaru Zajedničke komisije za administrativne poslove PSBiH za prisustvo sjednicama Vijeća;

- dopis upućen rukovodiocu Sektora za finansije Sekretarijata PSBiH za prisustvo sjednicama Vijeća;

- dopisi upućeni nadležnim službama, sektorima i komisijama Parlamentarne skupštine BiH u vezi s radom, funkcioniranjem i upitima, a po usvojenim zaključcima Vijeća nacionalnih manjina BiH.

Vijeće nacionalnih manjina BiH je u izvještajnom periodu, u skladu sa svojim nadležnostima, uredno odgovorilo na pristigle dopise, predstavke, upite i pozive.

U okviru svojih planiranih aktivnosti u izvještajnom periodu, članovi Vijeća nacionalnih manjina Bosne i Hercegovine učestvovali su na konferencijama i obilježavanjima značajnih datuma u vezi s nacionalnim manjinama i ljudskim pravima. Među najznačajnijim su:

- Regionalna konferencija o saradnji s nacionalnim manjinama, 5. i 6. 3. 2024, Sarajevo;
- Međunarodna konferencija „Članovi parlamenta i vjerski lideri za mir i suživot“, 12. 2. 2024, Sarajevo;
- Festival nacionalnih manjina Grada Prnjavora „Mala Evropa“, 22. 3. 2024, Prnjavor;
- obilježavanje Svjetskog dana Roma, 8. 4. 2024, Kakanj;
- 1. konferencija nacionalnih manjina BiH, 21. 5. 2024, Sarajevo;
- Okrugli sto „Socioekonomska inkluzija Roma i uloga civilnog društva u procesu pregovora BiH za članstvo u EU“, 30. 5. 2024, Sarajevo;
- obilježavanje Međunarodnog dana ljudskih prava, 10. 12. 2024, Banja Luka;
- učešće u radu Okruglog stola „Status nacionalnih manjina i zaštita ljudskih prava“, 10. 12. 2024, Banja Luka.

U izvještajnom periodu aktivnosti Vijeća su praćene i u medijima. Članovi Vijeća su aktivno artikulirali rad i aktivnosti Vijeća kroz medijska gostovanja na TV i radiostanicama te na druge načine u komunikaciji s javnošću govorili o statusu, položaju, ulozi, promoviranju prava i sveukupnom poboljšanju statusa pripadnika nacionalnih manjina, ali i teškoćama s kojima se susreću udruženja nacionalnih manjina u BiH u svom radu.

Također, rad Vijeća pratio je Sektor za odnose s javnošću Parlamentarne skupštine BiH, te su informacije o radu Vijeća redovno objavljivane na veb-stranici Parlamentarne skupštine BiH. Detaljne informacije o pojedinim aktivnostima dostupne su u materijalima za sjednice Vijeća nacionalnih manjina BiH, te kroz pojedinačne zapisnike.

Stručnu i administrativno-tehničku podršku Vijeću nacionalnih manjina BiH za sve planirane aktivnosti u 2024. godini - pripreme i održavanja sjednica u Sarajevu i izvan Sarajeva, organizacija konferencija, sastanaka, putovanja i svih ostalih aktivnosti, priprema dopisa, izvještaja, zaključaka, korespondencija s domaćim i međunarodnim institucijama, saradnja i komunikacija sa službama Parlamentarne skupštine BiH, a za potrebe Vijeća, pružio je i obavio Sektor za druga parlamentarna tijela Parlamentarne skupštine BiH.

Zaključak

Vijeće nacionalnih manjina BiH je tokom 2024. godine djelimično realiziralo aktivnosti planirane za 2024. godinu. Ipak, važno je navesti da je u ovom izvještajnom periodu Vijeće napravilo značajan iskorak u radu, što je rezultiralo održavanjem 1. konferencije nacionalnih manjina BiH te upućivanjem dvije važne inicijative relevantnim institucijama, a koje imaju veliki značaj za unapređenje uloge i značaja te poboljšanje statusa i položaja nacionalnih manjina u BiH.

Bez obzira na određene objektivne teškoće u izvještajnom periodu, Vijeće je u svom radu saradivalo s Ministarstvom za ljudska prava i izbjeglice BiH, Misijom OSCE-a u BiH, Vijećem Evrope u BiH, ambasadama država priznatih nacionalnih manjina u BiH, udruženjima nacionalnih manjina, nadležnim službama Parlamentarne skupštine BiH i ostalih institucija, te domaćim i međunarodnim organizacijama.



Predsjedavajući

Vijeća nacionalnih manjina BiH

Mirza Fafilić

